

歲

時

廣

記

歲時廣記卷第二十二

廣寒僊裔陳

元靚

編

端五 中

賜公服

皇朝歲時雜記端五賜從官已上酒團樓畫扇
陞朝官已上賜公服襯衫大夫已上加袴從官
又加黃繡裹肚執政又加紅繡裹肚三稽經筵
史官賜雜紗帽及頭帶帕子塗金銀裝扇子酒
果史官又加團茗上尊 仁宗時自從官以上

并講官賜御帛書扇稍攷李唐亦有此賜故杜甫端五日賜衣詩云宮衣亦有名端五被恩榮細葛含風軟香羅疊雪輕自天題處濕當暑着來清意內稱長短終身荷聖情

賜時服

楊文公談苑 國朝之制文武官諸劄校在京者端五賜衣服澠水燕談云陞朝官每歲端五賜時服又王沂公筆錄云聖節端五冬初賜百官時服舊制

賜金魚

李元紘傳五月五日宴武臣于殿羣臣賜襲衣時以紫服金魚賜元紘及蕭嵩

賜壽索

李肇翰林志端五賜百官壽索

賜帛扇

唐會要貞觀十八年五月五日太宗謂長孫無忌楊師道曰五日舊俗必用服玩相賀今朕各遺卿飛白扇二枚庶動清風增美德以推舊俗

之法

賜團扇

翰林志初選者召令赴銀臺試制書批答三首
內庫給青綺被紫絲履之類端五賜青團扇

賜鍾乳

芝田錄重五賜宋璟鍾乳璟命付醫合煉兒姪
曰上賜必珍付其家必欺換不如就宅修製璟
曰持誠示信尙懼見猜示人以不信其可得乎
爾勿以此待之

賜綵絲

唐文類劉禹錫謝端五表曰端五賜臣墨詔并衣一副金花器三事綵絲一軸又將衣四副綵絲五軸寵光游至慶賜曲霑

衣紗服

雜志一朝士五日起居衣紗公服爲臺司所糾三司使包拯亦衣紗公服閣門使請易之語曰有何條例答曰不見舊例只見至尊御此耳乃易之

進御衣

杜甫送向卿進奉端五御衣之上都惜別云裁
縫雲霧成御衣拜跪題封賀端午

置高會

國朝事實 太宗征太原行次檀淵有太僕寺
丞宋捷者掌出納行在餉儲迎謁道左 太宗
見其姓名喜以爲我師有必捷之兆車駕將至
令語攻城諸將曰我端午日當置酒高會於太
原城中至癸未繼先降迺五月五日也

作門帖

皇朝歲時雜記學士院端午前一月撰 皇帝
皇后夫人閤門帖子送後苑作院用羅帛製
造及期進入先是諸公所撰但宮詞而已及歐
陽脩學士始伸規諫 皇帝閱曰佳辰共喜沐
蘭湯毒冷何須採艾禳但得臯陶調鼎鼎自然
災殄變休祥又曰楚國因讒逐屈原終身無復
入君門願因角黍詢遺俗可鑒前王惑巧言後
人率皆倣之春日亦然民間以朱書詩或符呪

卷二十一
四
作門帖

納貢獻

漢食貨志端五四方貢獻至數千萬者加以恩澤而諸道侈靡以自媚

薦衣扇

唐禮志天寶二年諸陵常以五月五日薦衣扇

借褰襦

唐舊史萬年縣法曹孫伏伽上表曰近太常于民間借婦女裙襦以充妓女衣擬五月五日立

武門遊戲非所以爲子孫法也

寵妃子

天寶遺事五月五日明皇避暑遊興慶池與妃子寢於水殿中宮嬪輩凭欄倚檻爭看雌雄二鵝鵝戲於水中帝時擁妃子于消金帳內謂宮嬪曰爾等愛水中鵝鵝爭如我被底鴛鴦

惑從婢

北齊史馮小憐太穆后從婢也文襄王五月五日進之號曰續命能彈琵琶工歌舞後主惑之

齊亡周武以賜代王達達妃李氏爲小憐所譖
幾死隋文以賜達妃兄李詢詢令着裙配春

生賢嗣

異苑田文母五月五日生文父勅令勿舉之後
母私舉文長成童以實告之遂啟父曰不舉五
月子何父曰生及戶損父文曰受命於天豈受
命于戶若受命于戶何不高其戶誰能至其戶
耶父知爲賢嗣齊封孟嘗君俗以五月爲惡月
故忌

興吾宗

宋略王鎮惡以五月五日生家人欲棄之其祖
猛曰昔孟嘗君以此日生卒得相齊此兒必興
吾宗以鎮惡名之

舉猶子

西京雜記王鳳以五月五日生其父欲不舉曰
俗諺舉此日子長及戶則自害否則害其父母
其叔父曰昔田文亦以此日生其父嬰勸其母
曰勿舉其母竊舉之後爲孟嘗君號其母爲薛

公大家音姑以古事推之非不祥也遂舉之黃朝英詩云孟嘗此日鍾英氣王鳳今朝襲慶源

託胡姓

小說胡廣本姓黃以五月五日生父母惡之藏之胡盧棄之河疏岸側居人收養及長有盛名父母欲取之廣以爲背其所生則不義背其所養則忘恩兩無所歸託胡盧而生也乃姓胡名廣後七登三司有中庸之號

號萬迴

傳燈錄萬迴法雲公號州閩鄉人俗姓張氏初
母祈於觀音像而妊迴以唐貞觀六年五月五
日生始在弱齡笑敖如狂八九歲方能言迴兄
戊役于安西音問隔絕父母謂其誠死矣日夕
涕泣而憂思焉迴顧感念之甚忽長跪而言涕
泣豈非憂兄耶父母且疑且信曰然迴曰詳思
我兄所要者衣裝糗糧扉履之屬請悉備焉某
將往觀之忽一日朝齋所備而往夕返其家告
父母曰兄善矣發書視之乃兄迹也一家異之

弘農抵安西萬餘里以其萬里而迴故號曰萬迴和尚先是玄奘法師向佛國取經見佛龕題柱曰菩薩萬迴向閩鄉地教化或笑或罵或擊鼓言事必驗太平公主爲造宅於己宅之右則天武后臨朝遂以錦袍玉帶賜公其事又出談賓錄及兩京記東坡以玉帶施元長老次韻云錦袍錯落真相稱乞與佯狂老萬迴

乞去聲

取團玉

西域記于闐國有玉池每以端午日王親往取

玉自王以下至庶人皆取之每取一團玉以一團石投之

瀝神水

金門歲節端五日午時有雨則急斫竹一竿竹節中必有神水瀝取獺肝爲丸治心腹積聚病

送木湯

歲時雜記端五京師道士畫符作木湯送遣僧寺惟送團欒扇子

掘韭泥

歲時雜記端五日正午時韭畦面東不語取蚯蚓糞乾收之謂之六乙泥或爲魚刺所梗以少許擦咽外刺卽時自能消散

鍊草灰

本草云百草灰主腋臭及金瘡五月五日採乘露草一百種陰乾燒作灰以井華水爲團重燒令白以醎醋和爲餅腋下挾之乾卽易當抽身痛悶瘡出卽止以小便洗之不過三兩度又主金瘡止血生肌取灰和石灰爲團燒令白刮

傅瘡上

製艾煎

荆楚歲時記宗士炳之孫則字文度常以五月五日雞未鳴時採艾見似人處攬而取之用炙有驗又仇池筆記云端午日日未出時以意求艾似人者採之以炙殊效一書中見之忘其何書也又未有真似人者于明暗間以意命之而已又千金方云五月五日取艾七月七日日未出時取麻花等分合搗作炷炙諸癰百壯卽差

又本草云五月五日採艾曝乾作煎勿令見風
經久可用

膏桃人

古方用桃人一百箇去皮尖于乳鉢中細研不
得犯水候成膏入黃丹三錢丸如梧桐子大每
服三丸當發日面北用溫酒吞下不飲酒并花
水亦得五月五日午時合忌雞犬婦人見之大
治疔疾

燒葵子

四時纂要端五日取葵子燒作灰有患石淋者
亟以水調方寸服立愈

粉葛根

圖經本草五月五日午時採葛根暴乾以入土
深者爲佳今人多以作粉食之甚益人神農本
草云葛根一名雞齊根一名鹿藿一名黃斤生
汶山川谷陶隱居云端五日日中時取葛根爲
屑療金瘡斷血爲要藥亦療瘡及瘡

採菊莖

食療云甘菊平其葉正月採可作羹莖五月五日採花九月九日採並主頭風目眩淚出去煩熱利五臟野生苦菊不可用又提要錄云端午採艾葉立冬日採菊花葉燒灰沸湯泡澄清洗眼妙

浸糯米

靈苑方治金瘡水毒及竹木簽刺癰疽熱毒等糯米二升揀去粳米入瓷盆內于端午前四十九日以冷水浸一日兩度換水輕以手淘轉逼

去水勿令攪碎浸至端五日乃取出陰乾生絹袋盛挂當風處旋取少許炒令焦黑碾爲末冷水調如膏藥隨大小裹定瘡口外以綿絹包定更不要動直候瘡愈若金瘡誤犯生水瘡口作膿赤腫漸甚者急以藥裹定一二日久其腫處已消更不作膿直至瘡合若癰疽毒瘡初發才覺疼痛赤熱急以藥膏貼之疼痛腫毒一夜便消喉閉及咽喉腫痛叱腮並用藥貼項下腫處竹簽刺者臨臥貼之明日看其刺出在藥內若

貼腫處乾卽換之常令濕爲妙惟金瘡及水毒不可換恐傷動瘡口

棄榴花

歲時雜記人曰告赤者五月五日以紅絹或榴花及紅赤之物拭目而棄之云得之者代受其病

剪韭葉

瑣碎錄端五日午時剪韭葉和石灰搗作餅曬乾大能治撲損刀傷瘡口并蜂蠆蜈蚣之毒又

云取百草頭一斤韭五斤搗灰

調莧菜

食療云莧菜一名莫實五月五日採莧菜和馬齒爲末等分與調孕婦服之易差但未知治何病又云莧菜與鯊肉同食生鯊癰又云取鯊甲如豆大者以莧菜封裹之置於土坑內以土蓋之一宿盡變成鯊兒

刈菜耳

千金翼方五月五日午時刈地菜

私以反

耳葉多

取陰乾著大甕中此草辟惡若省病問疾服此而往則無所畏服法爲末酒服方寸七若時氣不和舉家服之并殺三重腸痔進食周年服之佳七月七九月九亦可採用本草云菜耳實久服耳目聰明輕身強志胡菜一名地葵一名常思許人謂之卷耳生安陸川谷

取木耳

千金翼方端五日採桑上木耳白如魚鱗者患喉痹卽以碎綿裹如彈丸蜜浸含之便差

服龍芮

本草石龍芮人服輕身不老令人皮膚光澤有子一名魯果能一名地樞一名天豆一名彭根生太山川澤石邊五月五日採子二月八日採皮陰乾爾雅云芡莖草郭璞注云烏頭苗也蘇恭注云天雄是石龍芮葉似莖草

乾麝舌

本草麝舌味辛微溫無毒主霍亂腹痛吐逆心煩生水中五月採陶隱居云生小水中五月五

日採乾以療霍亂良也

掛商陸

圖經本草商陸俗名章柳唯生咸陽山谷今處
處有之多生于人家園圃中春生苗高三四尺
葉青如牛舌而長莖青赤至柔脆夏秋開紅紫
花作朶根如蘆服而長五月五日採根竹筴盛
掛屋東北角陰乾百日搗篩井花水調服云神
仙所祕法喉中卒被毒氣攻痛者切根炙令熱
隔布熨之冷輒易立愈

薦漢木

養生要集木味甘苦小溫生漢中南鄭山谷五月五日採用王沂公作 太皇太后閣端五帖子云更聞天子孝薦木助長生章簡公端五帖子云木薦神仙餌菖蒲開富貴花

收蜀葵

四時纂要端五日收蜀葵赤白者各收陰乾治婦人赤白帶下爲末酒服赤者治赤白者治白大妙

屑地菘

陶隱居訣有一草似狼牙氣辛臭名地菘人呼爲劉槿音獲草五月五日採乾作屑主療金瘡言劉槿昔採用之耳

曬白礬

瑣碎錄端五日取白礬一塊自早日曬至晚收之誤爲百重所曬卽以此物傳之立效

丸青蒿

歲時雜記五月五日採青蒿搗石灰至午時丸

作餅子收蓄凡金刃所傷碾末傅之甚妙

種獨蒜

本草葫味辛有毒除風邪殺毒氣圖經曰葫大蒜也家園所蒔每頭六七瓣初種一瓣當年便成獨子葫至明年則復其本矣然其花中有實亦葫瓣狀而極小亦可種之五月五日採後魏李道念病褚澄視之曰公有重病答曰舊有冷痰今五年矣澄診之曰非冷非熱當時食白淪雞子過多今取蒜一頭煮之服藥乃吐一物如

升涎睡裏之開看乃雞雛翅羽頭爪齊全澄曰
未盡更服藥再吐十二頭後乃愈

食小蒜

本草小蒜味辛溫有小毒主霍亂圖經曰生田
野中根苗皆如葫而極細小者是也五月五日
採陶隱居云小蒜生葉可煮和食黃帝云不可
久食損人心力食小蒜啖生魚令人奪氣

汁葫荑

必效方葫荑味辛溫石勒諱胡并汾人呼爲香

葵主虫毒神驗以根絞汁半升和酒服之立下
又治諸石熱氣結滯經年數發以半斤五月五
日採陰乾水七升煮取三升去滓分服未差更
服春夏葉秋冬根莖並用亦可預備之

灰苦芙

食療云苦芙

音隕

微寒生食治漆瘡五月五日採

暴乾作灰傅面目通身漆瘡不堪多食陶隱居
云五月五日採暴乾燒作灰以療金瘡甚妙

羹繁萋

陶隱居云蘩蕞音縷菜人以作羹五月五日採暴

乾燒作屑療雜瘡及主積年惡瘡不愈者立效
亦可雜百草取之不必止此一種爾衍義曰蘩
蕞與雞腸草一物也今雖分之爲二其雞腸草
中獨不言性故知一物也雞腸草春開花如菜
豆大莖葉如園葵初生則直長大卽覆地小戶
收之爲葍食也烏髭髮又食療云溫作菜食之
益人治一切惡瘡擣汁傅之五月五日者驗

摘茱萸

本草車前子一名茺菖一名蝦蟆衣五月五日採陰乾仙經云服餌令人身輕能跳越岸谷不老而長生歐陽文忠公嘗得暴下國醫不能愈夫人云市人有此藥三文甚效公曰吾輩臚腑與市人不同不可服夫人買藥以國醫雜進之一服而愈後公知之召賣藥者厚遺之問其方久之乃肯傳但用車前子一味爲末飯飲下二錢七云此藥利水道而不動氣水道清濁分穀藏自止矣

啖菰蓉

本草肉菰蓉強陰益精多子五月五日採陰乾
陶隱居云代郡鴈門屬并州多馬處便有言野
馬精落地所生生時似肉以作羊肉羹補虛乏
極佳亦可生啖本經云五月五日採恐已老不
堪用故多三月採之

製菰蓉

成訥爲江陵府節度使進菰蓉丸方臣有弟誚
年三十二中氣伏床枕幾五年醫不差有道人

鍾計者因覩此患曰可餌稀漿丸必愈其藥多
生沃壤高三尺許節葉相對當夏五月已來收
每去地五寸剪刈以溫水洗泥土摘其葉及枝
頭凡九蒸九曝不得太燥但取足爲度仍熬擣
爲末丸如桐子大空心溫酒或米飲下二三十
丸服至二千丸所患忽加不得憂慮是藥攻之
力服至四千丸必得復故五千丸當復丁壯臣
依法修合與訐服果如其言鍾計又言此藥與
本草所述功效相異蓋出處盛在江東彼土人

呼豬爲稀呼臭爲蕪氣緣此藥如豬蕪氣故以爲名但經蒸暴蕪氣自泯每當服後須喫飯三五匙壓之五月五日採者佳奉宣付醫院詳錄收採見天貺節

相念藥

投荒錄有在番禺逢端午聞街中喧然賣相念藥聲訝笑召之乃蠻媼荷揭山中異草鬻於富婦人爲媚男藥用此日採取如神又云採鵲巢中獲兩小石號鵲枕此日得之者令婦人遇之

有抽金簪解耳瑤以償其直者

相愛藥

本草云無風獨搖草帶之使夫妻相愛生嶺南
頭如彈子尾若鳥尾兩片開合見人自動故曰
獨搖草按廣志云生嶺南又云生大秦國陶朱
術云五月五日採諸山野往往亦有之又圖經
云此草卽獨活苗也出雍州山谷或隴西南安
今蜀漢者佳此草得風不動無風自動故一名
獨搖草

相喜藥

本草云桃朱術取子帶之令婦人爲夫所愛喜
生園中細如芹花紫子作角以鏡向旁敲之則
子自發五月五日收之

能飲藥

千金方五月五日採小豆花葉陰乾末服之又
云五月五日取井中倒生草枝陰乾末酒服之
並飲酒令人不醉又本草云河邊木令人飲
酒五月五日取七寸投酒中二遍飲之必

能飲也

不忘藥

千金翼方常以五月五日取東向桃枝日未出時作三寸木人著衣帶中令人不忘事

急中藥

經驗方治急中風目瞑牙噤無門下藥者以中指點散子指齒二三十指大牙左右其口自開始得下藥名開關散白龍腦天南星等分乳鉢研爲細末用五月五日午時合患者只用一字

至半錢

丁根藥

本草斷罐草台羊蹄菜青苔半夏地骨皮蜂巢
小兒髮緋帛並等分作灰五月五日和諸藥末
服一錢七丁根出也

金瘡藥

林氏傳信方五月五日平旦使四人出四方各
於五里內採一方草木莖葉每種各一握勿令
漏脫一事日正午時細切碓搗入石灰極令爛

熟一石草一斗石灰先鑿桑樹令可受藥取藥
內孔中築令堅仍以桑樹皮蔽之別以麻搗石
灰極密泥之令不泄氣又以桑皮纏之至九月
九日午時取出陰乾百日藥成搗之日暴令乾
更搗絹篩貯之凡一切金瘡傷折出血登時以
藥封裹治使牢勿令動轉不過十日卽瘡雖突
厥質汁黃末未能及之名金瘡大散

採雜藥

荆楚歲時記五月五日競採雜藥可治百病又

本草所載收藥多以五日穎濱作帝閤端五帖子云靈藥收農錄薰風拂舜琴

春百藥

四時纂要端五日採百藥苗以品數多爲妙不限分兩春取自然汁和石灰三五升脫作餅子曝乾治一切金瘡血立止兼治小兒惡瘡

合諸藥

瑣碎錄五月上辰及端午日臘日除日前三日合藥可久不歇氣味

曝人藥

提要錄五月五日晴人曝藥歲無災雨則鬼曝藥人多病此閩中諺語

焚故藥

歲時雜記端五日午時聚先所蓄時藥悉當庭焚之辟疫氣或止燒朮

歲時廣記卷第二十二

歲時廣記卷第二十三

廣寒僊裔陳

元靚

編

端午下

進龍鏡

異聞集唐天寶中揚州進水心鏡一面青瑩耀
日背有盤龍勢如飛動元宗覽而異之進鏡官
揚州叅軍李守泰白鑄鏡時有老人自稱姓龍
名護鬢髮皓白眉垂肩衣白衣有小童衣黑衣
呼爲元冥至鏡所謂鏡匠呂暉曰老人解造真

龍鏡爲汝鑄之將愜帝意遂令元冥入鑪所扃
戶三日戶開呂暉等搜覓已失龍護及元冥所
在鑪前獲素書一紙云開元皇帝聖通神靈吾
遂降祉斯鏡可辟眾邪鑒萬物秦皇之鏡無以
加焉歌曰盤龍盤龍隱於鏡中分野有象變化
無窮興雲吐霧行雨生風上清仙子來獻聖聰
呂暉等移鑪以五月五日於揚子江心鑄之後
大旱不雨葉法善祠鏡龍於凝陰殿須臾雲氣
滿殿甘雨大澍酉陽雜俎云僧一行開元中嘗

阜元宗祈雨一行曰當持一器上有龍狀者方可致之命於內府遍視皆言不類後指一鏡鼻盤龍喜曰此真龍矣持入道場一夕而雨或云是揚州所進初模範時有異人至請閉戶入室數日開戶模成其人已失有圖并傳見行於世此鏡五月五日於揚子江江心鑄之者又李肇國史補云揚州舊貢江心鏡五月五日揚子江心所鑄也或言無百鍊者六七十鍊則止易破難成往往有鳴者

撰閣帖

容齋五筆云唐世五月五日揚州於江心鑄鏡
以進故 國朝翰苑撰端午帖子詞多用其事
然遣詞命意工拙不同王禹玉云紫閣曠曠隱
曉霞瑤墀九御薦萑華何時又進江心鑑試與
君王卻眾邪李邦直云艾葉成人後榴花結子
初江心新得鏡龍瑞護仙居趙彥若云揚子江
中方鑄鏡未央宮裏更飛符菱花欲共朱靈合
驅盡神姦又得無又云揚子江中百煉金寶奩

疑是月華沈爭如聖后無私鑑明照人間萬善
心又云江心百鍊青銅鏡架上雙紐翠縷衣李
士美云何須百鍊鑑自勝五兵符傅墨卿云百
鍊鑑從江上鑄五時花向帳前施許沖元云江
中今日成龍鑑花外多年廢鷺陂合照乾坤共
作鏡放生河海盡爲池蘇子由云揚子江中寫
鏡龍波如細縠不搖風宮中驚捧秋天月長照
人間助至公大概如此唯東坡不然曰講餘交
翟轉回廊始覺深宮夏日長揚子江心空百鍊

只將無逸鑑興亡其輝光氣焰可畏而仰也若
白樂天諷諫百鍊鏡篇云江心渡上舟中鑄五
月五日日午時背有九五飛天龍人人呼爲天
子鏡又云太宗但以人爲鏡監古監今不見容
乃知天子別有鏡不是揚州百鍊銅用意正與
坡合予亦嘗有一聯云願儲醫國三年艾不博
江心百鍊銅然去之遠矣端午故事莫如楚人
競渡之的蓋以其非吉祥不可施諸祝頌故必
用鏡事云

服金丹

神仙感異傳唐相國盧公鈞爲尚書郎以疾出
爲均州刺史常於郡後山齋獨處忽見一人衣
飾弊故踰垣而入自言姓王從山中來謂公曰
公之貴當位極人臣而壽不永故相救爾以腰
巾蘸於井中解丹十粒捩腰巾之水俾公咽之
明年公解印還京復見王曰君今年第二限終
爲災極重以公雪冤獄活三人之命災已息矣
後二十三年五月五日午時可令一道士於萬

卷二十三
山頂相助此時公節制漢土當有月華相授勿
愆期也公後出領漢南及期命道士牛知微登
萬山頂尋約而王已先在遂以金丹十粒令授
於公倏爾不見公服之年九十餘耳目聰鑒氣
力不衰

除鐵使

逸史王播少貧賤居揚州無人知識唯一軍將
常接引供給無不罄盡杜僕射亞領鹽鐵在淮
南端午日盛爲競渡之戲諸州徵異樂兩縣爭

勝負彩樓看棚照耀江水數十年以來未之有也凡揚州之客無賢不肖盡得預焉唯王公不招惆悵自責軍將曰某有棚一座子弟悉在彼但於棚內看卻勝居盤筵間也王公曰唯遂往棚時夏初日方熱軍將令送酒一榼王公自酌將盡棚中日色轉熱酒酣昏憊遂就枕纔睡夢身在宴處居杜之坐判官在下良久驚覺亦不敢言於人後爲宰相將除淮南鹽鐵使勅人未下因召舊從事語之曰某淮南鹽鐵定矣數日

果除到乃符昔年之夢時五月上旬也

誅幻僧

仙傳拾遺葉法善字道元處州松陽縣人四代
修道皆以陰功密行及劾召之術救物濟人初
師居四明之下天臺之東數年忽於五月一日
有老叟詣門號泣求救門人謂其有疾也師引
而問之答曰某東海龍也大帝所勅主入海之
寶一千年一更其任無過者超證仙品某已九
百七十年微績垂成有娑羅門逞其幻法住於

海峯晝夜梵咒積三十年其法將成海水如雲
卷在半天五月五日海將竭矣統天鎮海之寶
上帝制靈之物必爲幻僧所取五日午時乞以
丹符相救至時師敕丹符飛往救之海水仍舊
胡僧愧歎赴海而死明日龍輦寶貨奇珍來以
報師師曰林野之中棲神之所不以珠璣寶貨
爲用一無所取因謂龍曰此崖石之上去水且
遠但致一清泉卽爲惠也是夕聞風雨之聲及
明遶山齋四面成一道石渠泉水流注終冬不

竭至今謂之天師渠

碎鬼宅

廣異記趙州盧叅軍其妻甚美罷官還都五月五日妻欲之市求續命物上舅姑車已臨門忽暴心痛食頃而卒盧往見正議大夫明崇儼扣門甚急崇儼驚曰端午日欵關而厲是必有急遂趨而出盧乃拜以聞崇儼云此泰山三郎所爲遂書三符以授盧還家可速燒第一符如人行十里許不活更燒其次若又不活更燒第三

符橫死必當復生不來必死矣盧還家如言燒符其妻遂活頃之能言云初被車載至太山頂別有宮室見一少年云是三郎侍婢十餘人擁入別室待粧甫畢三郎在堂前伺候方擬宴會有頃聞人歛門云上隸功曹奉都使處分問三郎何以取盧家婦宜卽遣還三郎怒呵功曹令去須臾又聞歛門云是直符使者都使令取盧夫人又不聽尋有疾風吹黑雲從山頂來二使唱言太乙直符至矣三郎有懼色忽捲宅高百

餘丈放之人物糜碎唯盧妻獲存二使送還至家見身臥床上意甚悽愴被人推入形遂活

尋父屍

東漢烈女傳孝女曹娥者會稽上虞人父盱能絃歌爲巫競漢安二年五月五日於縣江沂濤婆娑迎神溺死不得其屍娥年十四乃沿江號哭晝夜不絕聲旬有七日遂投江而死至元嘉元年縣長度尙改葬娥於江南道旁爲立碑焉會稽典刑錄云曹娥投江死三日後與父屍俱

出

知人命

王明清揮麈錄姚宏字令聲越人也宣和中在上庠有僧妙應者能知人休咎語宏云君不得以命終候端午日伍子胥廟中見榴花開則奇禍至矣宏初任監杭州稅三年不敢登吳山後知衢州江山縣將赴官來謁帥憲旣歸出城數里值大風雨亟憩路旁一小廟中見庭下榴花盛開詢諸祝史云此伍子胥廟其日乃五月五

日宏慘然登車未幾追赴大理死獄中先是宏嘗語人曰世所傳秦丞相上書黏罕乞存趙氏其書與賁來者大不同更易其語以掠其美名秦聞之大怒會宏在江山當時亢旱有巡檢者能以法致雨試之果然邑民訟其以妖術惑眾由是追赴棘寺遂罹其酷

翦佛鬚

細素雜記劉公喜說云晉謝靈運鬚美臨刑施於南海祇洹寺爲維摩詰像鬚寺人保惜畧不

虧損中宗朝安樂公主端五日鬪草欲廣獲其
物色令人馳驛取之又恐爲他人所得因剪棄
其餘今遂絕又見國史纂異東坡詩云猶勝江
左狂靈運共鬪東昏百草鬚蘇子由詩云長歎
靈運不知道強剪美髭挿兩顴

絕妖恠

廣異記唐賀蘭進明爲御史在京其兄子莊在
睢陽爲狐所媚每到時節狐新媚恆至京宅通
名起居兼持賀遺及問訊家人或有見者狀貌

甚美至五月五日自進明已下至於僕隸皆有
續命物家人以爲不祥多焚其物狐悲泣云此
並眞物如何焚之其後所得遂以充用後家人
有就狐乞漆背金花鏡者狐入人家偷鏡掛項
緣牆而行爲主人家擊殺自爾恠絕

溺狐媚

廣異記唐宋州刺史王璿少時儀貌甚美爲牝
狐所媚家人或有見者風姿端麗雖僮幼遇之
者必斂容致敬自稱新媚荅對皆有理由是人

樂見之每至端午及佳節悉有續命物饋送云
新嬪上某郎某娘續命眾人笑之然所得甚眾
後璿職高狐乃不至蓋其祿重物不得爲怪

占雀鳴

唐書崔信明益都人以五月五日正午時生有
異雀數頭身形甚小五色皆備集於庭樹鼓翼
齊鳴其聲清亮太史良占曰五月爲火火爲離
離爲文日正中文之盛也又雀五色而鳴此兒
必文藻煥爛名播天下雀形旣小祿位殆不高

耳及長博聞強記下筆成章雖名冠一時而位不達

滴蛇血

夷堅丁志河中府一客以端午日入農家乞漿值其盡出刈麥方小立聞屋側喀喀作聲趨而視之則有蛇踞屋上垂頭簷間滴血于盆中客知必毒人者默自念吾當爲人除害乃悉取血寘其家壘甕中詣鄰舍以須良久彼家長幼負麥歸皆渴困爭赴厨飲壘汁客飯畢復過其門

則盡室死矣

戒牛肉

藏經每歲五月五日瘟神巡行世間宜以朱砂
大書云本家不食牛肉天行已過使者須知十
四字貼於門上可辟瘟疫蓋不食牛肉之家瘟
神自不侵犯今人多節去本家不食牛肉六字
只貼云天行已過使者須知八字遂使藏經語
意不全

飼蜥蜴

漢武內傳武帝以端午日取蜥蜴置之器飼以丹砂至明年端午搗之以塗宮人之臂有所犯則消沒不爾則如赤痣故得守宮之名張華博物志云蜥蜴或名蜴蜥以器養之飼以朱砂體盡赤所食滿七斤搗萬杵點女人肢體終身不滅惟房室事則滅故號守宮東方朔奏武帝用之有驗淮南畢萬術云取守宮輒合陰陽者以牝牡各藏之瓮中陰乾百日以點女臂則生文章與男子合陰陽則滅去也翰苑名談云守宮

其形大概類蜥蜴足短而加濶亦有金色者秦
始皇時有人進之云能守鑰人不敢竊發鑰故
名守宮或曰以守宮繫宮人之臂守宮吐血污
臂者有淫心也秦皇殺之又爾雅云蝾螈蝾螈
蜥蜴守宮同爲一物又陶蘇注本草云其類有
四種一大形純黃爲蛇醫次小形長尾見人不
動名龍子次小形而五色尾青碧可愛名蜥蜴
並不螫人一種喜緣籬壁名蝾螈形小而黑乃
言螫人必死又名守宮李賀詩云象房夜擣紅

守宮李商隱詩云巴西夜搗紅守宮後房點臂
班班紅劉筠宮詞云難消守宮血易斷鸞柱膠
古宮詞云愛惜加窮袴防閑託守宮

捕蟾蜍

抱朴子內篇肉芝者謂萬歲蟾蜍頭上有角目
赤額下有丹書八字體重而跳捷以五月五日
中時取之陰乾百日以其足畫地卽爲流水帶
其左手於身辟五兵若敵人射已弓矢弩皆反
還自射也又元中記云食之者壽千歲王氏神

仙傳云益州北平山上有白蝦蟇謂之肉芝非
仙方靈骨莫能致也又荆楚歲時記云五月五
日俗以此日取蟾蜍爲辟兵六日則不中用故
世云六日蟾蜍起於此也陳簡齋詩云六日蟾
蜍乖世用

得啄木

荆楚歲時記云野人以五月五日得啄木貨之
主齒痛古今異傳云本雷公採藥吏化爲此鳥
淮南子云斲木愈齟其信矣乎又有青黑者頭

上有紅毛生山中土人呼爲山啄木大如鷓鴣本草云啄木鳥主痔瘻治牙齒蠶蚱燒爲末納牙孔中不過三數此鳥有小有大有褐有斑褐者是雌斑者是雄穿木食蠹爾雅云鷽斲木又深師方云治蛀牙有孔疼者以啄木鳥舌尖綿裹於痛處咬之

羹梟鳥

漢史曰五月五日作梟羹賜百官以其惡鳥故以五日食之古者重梟炙及梟羹蓋欲滅其族

類也嶺表錄異云鵒鵒卽鵒也鬼車之屬亦名
夜遊女輒鳴屋上則有咎荆楚歲時記云聞之
當喚狗耳又曰鵒大如鳩惡聲飛入人家不祥
其肉美堪爲炙故莊子云見彈思鵒炙又云古
人重鵒炙尙肥美也說文云梟不孝鳥食母而
後能飛東坡端五詩云和羹未賜梟穎濱作
太皇太后閭端五帖子云百官卻拜梟羹賜凶
去方知舜有功

養鵒鵒

零陵總記鸛鵒人多養之五月五日去其舌尖則能語聲尤清越雖鸛鵒不能過也劉義慶幽明錄云晉司空桓豁在荊州有叅軍五月五日剪鸛鵒舌教語無所不能後於大會悉效人語聲無不相類者時有叅佐鰓鼻因內頭盆中效之有主典盜牛肉乃白叅軍以新荷葉裹置屏風後搜得罰盜者僧虛中端午詩云菖蒲花不艷鸛鵒性多靈

帶布穀

北戶錄布穀腳脰骨令人夫妻相愛五月五日
收帶之各一男左女右置之水中自能相隨江
東呼爲郭公北人云撥穀一名穫穀似鷓鴣長尾
爾雅云鳴鳩注云今之布穀也牝牡飛鳴以羽
相拂禮記月令云鳴鳩拂其羽

破蝮蛇

本草蝮蛇膽苦味微寒有毒主蠱瘡五月五日
取燒地令熱置蛇其中以酒沃之足出醫家所
用乃赤蠅黃領多在人家屋壁間吞鼠子雀雛

見腹中大者破取乾之

進蛇膽

朝野僉載泉建州進蚺蛇膽五月五日取時豎兩柱相去五六尺繫蛇頭尾以杖於腹下來去扣之膽卽聚以刀刮取藥封放之不死後復更取看肋下有痕卽放酉陽雜俎云蚺蛇膽上旬近頭中旬在心下旬在尾圖經云出交廣七州嶺南諸州藥性論云蚺蛇膽主下部虫殺小兒五疳

取蛇蛻

本草蛇蛻主小兒百二十種驚癇一名龍子衣
一名蛇符一名弓皮生荊州川谷及田野五月
五日十五日取之良陳藏器云蛇蛻主瘡取正
發日以蛻皮塞病人兩耳臨發時又以手持少
許并服一合鹽醋汁令吐也

食蛇肉

朝野僉載泉州有客盧元欽染大風唯鼻根未
倒屬五月五日官取蚺蛇膽欲進或言肉可治

風遂取一截蛇肉食之三五日頓漸可百日平復又商州有人患大風家人惡之山中爲起茅舍有烏蛇墜酒罌中病人不知飲酒漸瘥罌底見蛇骨方知其由也

焚鵲巢

酉陽雜俎鵲構巢取在樹杪枝不取墮地者又傳枝受卵端五日午時焚其巢炙病者其疾立愈

用鵲腦

陶隱居秘訣五月五日取雄鵲腦入術家用一名飛駁

灰猪齒

本草猪齒主小兒驚癇五月五日取日華子云猪齒治小兒驚癇燒灰服并治蛇咬

煉狗糞

外臺秘要治馬鞍瘡狗牙灰醋和敷之又五月五日取牡狗糞燒灰數傅之良

斷龍爪

提要錄五月五日取鼈爪著衣領中令人不忘

燒鱖頭

本草鱖頭味甘大溫無毒五月五日取頭骨燒之止痢

捉蝦蟇

神農本草蝦蟇一名苦蠃五月五日取東行者四枚反縛著密室中閉之明旦啟視自解者取爲術用能使人縛亦自解燒灰傅瘡立驗其筋塗玉刻之如蠟又藥性論云端午取蝦蟇脂

以朱砂麝香爲丸如麻子小孩兒疳瘦者空心
一丸如腦疳以爛汁調滴鼻中立愈

蒸蟻蜋

本草蟻蜋寒有毒主小兒驚癇一名蛭蜋五月
五日取蒸藏之臨用當炙勿置水中令人吐莊
子云蛭蜋之智在於轉丸喜入糞中取屎丸以
腳推之俗名推丸當取大者其類有三四種以
鼻頭扁者爲真劉涓子云治鼠瘻死蟻蜋燒作
末苦酒和傳之數過卽愈先以鹽湯洗

埋蜻蛉

埤雅云五月五日取蜻蛉首正中門埋之皆成青珠又博物志云埋蜻蛉頭於西向戶下則化成青色珠故類從曰蜻蛉之首瘞而爲珠

取螻蛄

四民月令五月五日取蟾蜍可合惡疽藥又取東行螻蛄治嬾人難產

候蚯蚓

本草云蟲螽蚯蚓二物異類同穴爲雌雄令人

相愛五月五日收取夫婦帶之蟲蚤如蝗更東人呼爲蚱蜢有毒有黑斑者候交時取之

收鼠婦

本草云鼠婦微寒無毒主氣癰不得小便婦人月閉血瘕生魏郡平谷及人家地上五月五日取日華子云鼠婦虫有毒通小便能墮胎

乾伏翼

陳藏器本草云伏翼主蚊子五月五日取倒懸者曬乾和桂薰陸香爲細末燒之蚊子去又云

取其血滴目令人不睡夜中見物瑣碎後錄曰
端午日以麻線一條圍床周匝以蝙蝠血塗床
四向可絕蚊蚋

汁蠅虎

博聞錄五月五日午時取蠅虎汁拌黑豆其豆
自能踴躍擊蠅

去蚊蠓

埧碎錄五月五日取浮萍草日曬乾二月收桐
花和夜明砂合搗末作香印燒堂中辟蚊蠓一

云五月皆可採

辟蚊子

提要錄五月五日午時望太陽吸太陽氣念咒
口天上金雞喫蚊子腦體一氣七遍噴燈心上
遇夜將燈心點燈辟去蚊子之屬

浴蠶種

博聞錄閩俗端午日以溲粽汁浴蠶種續以蒲
艾桃柳葉按井花水澄清再浴懸淨處

進花圖

酉陽雜俎北朝婦人以五月五日進五時花施于帳上傅墨卿端五帖子云百鍊鑑從江上鑄五時花向帳前施

採巖藥

圖經寧德縣邑人程公端五日入巖採藥忽然輕舉因曰五日巖

生彌勒

酉陽雜俎龜茲國以五月五日爲彌勒佛下生

日

龜音邱
茲音慈

討賽離

燕北雜記五月五日午時採艾葉與綿相和絮衣七事戎主著之番漢臣僚各賜艾衣三事戎主及臣僚飲宴渤海厨子進艾糕各點大黃湯下番呼此節爲討賽離

歲時廣記卷第二十三

歲時廣記卷第二十四

廣寒僊裔陳

元靚

編

朝節

圖經云池陽風俗不喜端午而重夏至以角黍舒雁往還謂之朝節歲時雜記云潁江州郡皆重夏至殺鵝爲炙以相遺村民尤重此日

頒冰酒

會要唐學士初上賜食悉是蓬萊池魚鱸夏至

頒冰及酒以酒味濃和冰而飲李德裕詩云荷
淨蓬池贈冰寒郢水醪蓋禁中有郢酒坊

禁舉火

後漢禮儀志夏至禁舉火作炭鼓鑄消石冶皆
止

進粉囊

酉陽雜俎北朝婦人夏至進扇及脂粉囊皆有
辭

結杏子

文昌雜錄唐歲時節物夏至則有結杏子

著五綵

風俗通夏至日著五綵辟兵題曰游光厲鬼知其名者無瘟疾五綵辟五兵也今人取新斷織繫戶亦此類也一云厲鬼字野重游光

施朱索

續漢書禮儀志夏至陰氣萌作恐物不成以朱索連桃印施門戶後世所尚以爲飾也

求百飯

歲時雜記京輔舊俗皆謂夏至日食百家飯則耐夏然百家飯難集相傳於姓柏人家求飯以當之有鑿工柏仲宣太保每歲夏至日炊飯饋送知識家又云求三家飯以供晨餐皆不知其所自來

作淨饌

歲時雜記江東僧以夏至日作淨饌送檀越家
吞暑符

朝野僉載或問不熱之道荅曰夏至日服玄冰

九飛雪散六壬六癸符暑不能侵

餌硫黃

孫公談圃硫黃神仙藥也每歲夏至三伏日必餌百粒去臟腑中滯穢甚有驗焉客因與公言曰夫硫黃之與鍾乳皆生於石陽氣溶液凝結而就石陰也夏至陽發乎地相薄而不和故聚爲大熱之藥硫黃伏於石下泉源所發則蒸爲湯其沸可以烹飪是宜服之殺人粉以爲劑老幼皆可服得火者多發爲背疽若鍾乳生巖穴

流如馬潼結如鵝管虛圓空中若不足畏者然
不待火研以玉槌七晝夜不息而其性燥怒不
解甚於硫黃昔夏文莊公服藥粥有小吏食其
餘流血而殂用此二藥也硫黃信有驗殆不可
多服苦陸生韭菜柔脆可茹則名爲草鍾乳水
產之茨其甘滑可食則名水硫黃豈二物亦性
之煖歟不然徒盜其名也公撫掌而笑

服丹藥

瑱碎錄金液丹硫黃煉成乃純陽之物夏至人

多服之又本草螻蛄一名螻蛄一名天螻蛄出肉中刺生東城平澤中夜出者良夏至日取曝乾孫真人方云治箭鏃在咽喉胷鬲及針刺不出以螻蛄搗取汁滴上三五度箭頭自出

驗貓鼻

酉陽雜俎貓目睛旦暮圓及午豎欽如綻其鼻端常冷唯夏至一日暖貓洗面過耳則客至貓一名蒙貴一名烏員

改井水

續漢書禮儀志夏至日浚井改水冬至日鑽燧
改火可去溫病

躍井水

春秋考異郵夏至井水躍

天貺節

國朝會要曰祥符四年正月詔以六月六
日天書再降日爲天貺節在京禁屠宰九
日詔諸路並禁從歐陽彪之請也

謁聖祖

嘉泰事類儀制令諸州立聖祖殿天貺節州長吏率在城官朝謁

詔醮設

國朝會要祥符元年六月六日天書降兖州泰山醴泉二年五月八日詔曰其六月六日天書降泰山日宜令醮設

賜休假

國朝會要祥符二年六月詔在京諸州六月六日並賜休假一日前此遣中使詣宰臣王旦第

特令中外賜假至今以爲休務

罷朝謁

容齋五筆大中祥符之世諛佞之臣造爲司命天尊下降及天書等事於是降聖天慶天祺天貺諸節並興始時京師宮觀每節齋醮七日旋減爲三日爲一日後不復講百官朝謁之禮亦罷今中都未嘗舉行亦無休假獨外郡必詣天慶觀朝拜遂休務至有前後各一日此爲敬事司命殆過於上帝矣其當寢明甚惜無人能建

白者

宜禳禱

道藏經六月六日爲清暑之日崇寧眞君降誕之辰正一朝修圖曰六月六日眞武靈應眞君下降日護國顯應公誕生之日大宜禳禱

獻香楮

東京夢華錄崔府君廟在京城北十五里世傳府君以六月六日生傾城具香楮往獻之本廟在磁州是日尤盛事具碑記

服豨薺

圖經本草云豨薺

音秋

俗呼火杓草今處處有之

人亦皆識春生苗似芥菜而狹長秋初有花如菊秋未結實頗似鶴虱近世多有單服者云甚益元氣蜀人服之之法五月五日六月六日九月九日採其葉去根莖花實淨洗曝乾入甌層酒與蜜蒸之又曝如此九過則已氣味極香美熬搗篩蜜丸服之治肝腎風氣四肢麻痺骨間痛腰膝無力者亦能行大腸氣惟文州高郵軍

者性熱無毒服之補虛安五臟生毛髮主肌肉
麻痺婦人久冷尤宜服之他州所產者有毒不
宜用

收瓜蒂

經驗方治遍身如金色瓜蒂四十九箇須是六
月六日收者丁香四十九箇用甘錫子燒煙盡
爲度細研爲末小兒用半字吹鼻內及揩牙大
人用一字吹鼻內立差

造神麵

歲時雜記醫方所用神麴皆六月六日造也其法以河水和麴作塊如瓦磚狀大小隨意以紙重裹懸風處一月可用和麴不得太軟本草云麴味甘大暖六月作者良賈相公進牛經云牛生衣不下取六月六日麴末三合酒一升灌便下

煎楮實

經驗後方煉穀子煎法取穀子五升六月六日採以水一石煮取五升去滓微火煎如飴堪用

隱居云穀子卽楮實也仙方取以搗汁和丹
抱朴子云楮實赤者服之老者少令人夜能徹
視鬼神道士梁頓年七十乃服楮實者久服轉
爲骨軟疾

釀穀醋

治生先務閩人以六月六日造穀醋合醬或云
其日水好

歲時廣記卷第二十四